

田獵以動其意心亂發狂貴藏難得之貨心惑怖盜日夜隄妨則向之所謂五神者化爲五賊蠱我精神擾我魂魄耗我元靈魅我真性爲我之害也是以至人教人存五神斬五賊實其腹以養氣不悅目以亂心全諸內以養其真忘諸外以驅其妄故云去彼取此

寵辱若驚章第十三

寵辱若驚貴大患若身何謂寵辱寵爲上辱爲下得之若驚失之若驚何謂貴大患若身之所以有大患者爲吾有身及吾無身吾有何患故貴以身爲天下若可以寄天下愛以身爲天下若可以託天下

道藏輯要

道德上經釋辭

齒

心集九

寵謂榮寵辱恥辱也若驚者謂妄動其心然非性情之正也何謂者設問之辭也凡人莫不貴榮而賤辱故以寵爲上辱爲下也寵辱本無分別之者妄情也世俗旣以富貴榮寵爲得志必以貧賤恥辱爲失時榮寵之也得必驚而喜之恥辱之也失必驚而怒之是謂得之若驚失之若驚也患者憂苦疾厄也身謂幻形非真形也真身無患被血月之軀爲之累也達斯理者識破虛幻則知形非真我悟物皆空則識外緣虛假自然忘形去累業苦潛消復何患之有也此章之意蓋謂寵辱不足驚而人自驚之身不必貴而人自貴之良由以情識妄動其心自私而貴其生其若心能忘也則寵辱不足

驚身能忘也則憂患不能入若以貴愛其身之心而貴愛天下則知人卽我也我卽人也無一人不在貴愛之中無一物不在慈祥之內故可以爲天下之寄託也寄託者如可以託六尺之孤寄百里之命義同

視之不見章第十四

視之不見名曰夷聽之不聞名曰希搏之不得名曰微此三者不可致詰故混而爲一其上不皦其下不昧繩繩兮不可名復歸於無物是謂無狀之狀無象之象是謂恍惚迎之不見其首隨之不見其後執古之道以御今之有能知古始是謂道紀

道無色故視之不見道無聲故聽之不聞道無形故搏之不

道藏輯要

道德上經釋辭

五

心集九
八八

得言此夷希微三者不能以言語審諦而分別之故云不可致詰故混而爲一也求之於上而不見其明求之於下亦不爲其晦求之於自古及今繩繩兮如是之悠久終不見其際故不可得而名之然則歸之於無物可也反復求之於無物之地但見無狀無象之中而有至妙至真之理又不得謂之無物也謂之有也而不見其形端謂之無也而物賴之以成若有若無恍恍惚惚終不能以爲象以爲名也繼而求之於前而不見其有始反而求之於後亦不知其有終隨迎始終而莫能見復求之於古之道古之道本無求之於無而無亦無則莫知其所以然矣然後始知此天地萬物皆自古初之